

Hronika / Chronik

Izvyještaj o radu Centra za balkanološka ispitivanja ANUBiH u 2012. godini

U 2012. godini Centar je sa priličnim naporima uspio realizirati sve planirane aktivnosti. U januaru 2012. godine objavljen je jubilarni broj Godišnjaka broj 40. za 2011. godinu u kojem je objavljeno ukupno 14 članaka i jedan prikaz, redovna hronika Centra, kao i kompletna bibliografija svih radova objavljenih u 40 brojeva časopisa. Svoje priloge u ovom broju dali su naučnici i saradnici iz Australije, Bosne i Hercegovine, Hrvatske, Kosova, SR Njemačke i Velike Britanije. Uz aktuelni broj priložen je i DVD sa sadržajem svih 40 brojeva u pdf izdanju čime se prigodno nastojalo obilježiti izdavanje jubilarnog četrdesetog broja. Od ovog broja časopis je indeksiran u bazama C.E.E.O.L (Central and Eastern European Online Library) i Ebsco Publishing. Godišnjak je u okviru redovne razmjene upućen na oko 150 adresa najznačajnijih institucija u zemlji i inostranstvu koje se bave arheologijom, historijom, etnologijom, lingvistikom i antropologijom. Izdavanje ovog broja Godišnjaka finansijski su pomogli Fondacija za izdavaštvo pri Federalnom ministarstvu kulture i sporta, Rimsko-germanska komisija Njemačkog arheološkog instituta iz Frankfurta na Majni i Regionalni austrijski ured za naučnu i kulturnu saradnju u Sarajevu. Svi brojevi Godišnjaka su postavljeni na web stranicu Akademije te su u pdf formatu dostupni svim zainteresovanim čitaocima.

Početakom 2012. godine završena je realizacija prve dvije faze projekta digitalizacije kartoteke "Grobovi prastanovnika zapadnog Balkana". Sredstva za projekat dodijeljena su od strane Federalnog ministarstva obrazovanja i nauke i Ministarstva civilnih poslova Bosne i Hercegovine. Nakon što je u 2011. godini napravljena analiza cjelokupnog materijala i kreiran model informacione baze, početkom 2012. godine završen je proces unosa sadržaja sa postojećih kartona te skeniranje i obrada slikovnih sadržaja kartona (crteži arheološkog materijala) i njihovo unošenje u bazu podataka. Za izvođenje treće faze projekta, koja obuhvata sređivanje informacione baze podataka (analiza i dizajn), sistematizaciju unesenih podataka (razvoj, testiranje) i web prezentaciju (implementacija), tražena su sredstva putem podnošenja aplikacija na javne pozive Ministarstva civilnih poslova Bosne i Hercegovine, Federalnog ministarstva kulture i sporta i BH Telecoma, no nijedna od navedenih aplikacija nije pozitivno riješena. U planu za 2013. godinu ostaje traženje sredstava za okončanje ovog projekta.

Još je u novembru 2011. godine u Centru pokrenuta inicijativa za organiziranje Međunarodnog naučnog skupa "Balkanologija danas" kojim bi se na najadekvatniji način obilježila 50. godišnjica postojanja i rada Centra. Prijedlog za organiziranje ovog skupa i drugih pratećih manifestacija (promocija izdanja Centra, organiziranje prigodne izložbe, pripremanje brošure o Centru sa digitaliziranim izdanjima) usvojen je početkom 2012. godine na Odjeljenju humanističkih nauka, a od Izvršnog odbora je u isto vrijeme traženo da se organizacija Međunarodnog naučnog skupa "Balkanologija danas" uvrsti u listu prioriteta u ANUBiH za 2013. godinu.

U skladu sa usvojenim planom, tokom 2012. godine u Centru se intenzivno radilo kako na organiziranju naučnog skupa tako i na pribavljanju finansijskih sredstava potrebnih za njegovu realizaciju i prateće manifestacije. Organizacioni odbor je održao nekoliko sastanaka na kojima je usvojena lista od ukupno 17 tema koje će biti prezentirane na skupu te određeni referenti koji će pripremiti izlaganja. Održavanje skupa planirano je za drugu polovinu oktobra 2013. godine, a referate će držati najeminentniji naučnici iz Austrije, Bosne i Hercegovine, Hrvatske, SR Njemačke, SAD-a, Srbije, Turske i Velike Britanije. Za spomenute aktivnosti Centar je u 2012. godini uputio aplikacije Ministarstvu civilnih poslova i Ministarstvu kulture i sporta Kantona Sarajevo. Dobijene su odluke o dodjeli sredstava od strane Ministarstva civilnih poslova 10.000 KM (sredstva su pristigla) i Ministarstva kulture i sporta Kantona Sarajevo 10.000 KM.

S obzirom na to da su za realizaciju planiranih aktivnosti potrebna sredstva u visini od cca. 45.000 KM, planiraju se uputiti molbe za podršku Federalnom ministarstvu kulture i sporta i drugim ministarstvima, poje-

dinim opštinama u BiH (Sarajevo, Zenica, Tuzla, Mostar, Tešanj – gdje je planirano organiziranje izložbe izdanja Centra), BH Telecomu i drugim privrednim subjektima, kao i ambasadama Austrije, Njemačke, Turske, SAD-a i Velike Britanije, za podršku učešća referenata koji dolaze iz tih zemalja te oko organiziranja simultanog prevoda izlaganja. Radovi sa ovog međunarodnog naučnog skupa biće objavljeni u Godišnjaku za 2013. godinu.

Težište rada na izdavačkoj djelatnosti u drugoj polovini godine bilo je na pripremama za izdavanje knjiga dr. Veljka Paškvalina, akademika Alojza Benca i Godišnjaka br. 41 za 2012. godinu.

U novembru 2012. godine izdata je knjiga dr. Veljka Paškvalina “Antički sepulkralni spomenici sa područja Bosne i Hercegovine”. Knjiga je izdata u seriji Djela ANUBiH, br. LXXXIII, Centar za balkanološka ispitivanja br. 9, zahvaljujući finansijskog podršci Ureda Matice hrvatske u Sarajevu, Federalnog ministarstva kulture i sporta, Federalnog ministarstva turizma i okoliša i Ministarstva obrazovanja i nauke Kantona Sarajevo. Urednici knjige su prof. dr. Blagoje Govedarica, domaći član ANUBiH i član Centra i akademik Nenad Cambi, član HAZU i član Centra. Knjiga je upućena u redovnu razmjenu.

U decembru 2012. godine izdata je knjiga “Religijske predstave prastanovnika južnoslovenskih zemalja” akademika Alojza Benca. Rukopis pronađen u zaostavštini akademika Benca njegova porodica predala je Centru na objavljivanje. Posao priređivanja i uređivanja rukopisa za štampu obavio je urednik prof. dr. Blagoje Govedarica, domaći član ANUBiH, sa saradnicom Centra Melisom Forić. Knjiga je, u povodu obilježavanja dvadesete godišnjice od smrti akademika Benca, osnivača i dugogodišnjeg direktora Centra, izdata u seriji Djela ANUBiH knj. LXXXIV, CBI knj. 10. Sredstva za objavljivanje knjige dodijeljena su od strane Fondacije za izdavaštvo Sarajevo i Federalnog ministarstva obrazovanja i nauke.

U drugom dijelu 2012. godine intenzivno se radilo na pripremi Godišnjaka br. 41. Svoje priloge u ovom broju dali su naučnici i saradnici iz Bosne i Hercegovine, Hrvatske, Kosova, SR Njemačke, Srbije i Rusije, a časopis se sastoji iz ukupno 15 članaka, devet prikaza, redovne hronike Centra i jednog teksta in memoriam. Osim u bazama C.E.E.O.L (Central and Eastern European Online Library) i Ebsco Publishing od ovog broja časopis je indeksiran i u ULRICH Periodicals te ZENON DAI (Journal data base of German Archaeological Institute). Izdavanje ovog broja Godišnjaka finansijski su pomogli Fondacija za izdavaštvo pri Federalnom ministarstvu kulture i sporta i Rimsko-germanska komisija Njemačkog arheološkog instituta iz Frankfurta na Majni.

Melisa Forić